

多圖入
京師圖書館



鄒平縣志

中華民國三年續修

鄒平縣志

官庫藏板

鄒平縣志原序一

濟南之鄒平在古爲鄒侯國漢稱今名有伏生勝傳
尙書秦火之餘名傳後世而宋范文正公仲淹嘗讀
書縣之黌堂嶺書堂在焉邑多文人予按部至謁伏
生祠墓與諸生講學望長白山雲氣來接賦詩樂之
徵縣志文字多磨滅不辨縣令徐君聖齊彬彬文學
君子也以扶墜補闕爲已任請從事修輯是時比部
張舉之請告家居藏書多善本博采勤蒐進士馬宛
斯討核詳實而吳門顧亭人自上谷來悉授以校之
書遂成三君之言曰志者一邑之掌故貴事核而言

鄒平縣志

原序

簡核取其徵簡取其嚴非若世之文集家乘遊山記
可矜奇而務博納交而貢諛也君子以爲然故徵文
考獻網羅遠近放失而向所附會及詞不雅馴者皆
辨正芟去其載在編者皆可信而可觀也六郡惟濟
南登州二志燬余旣從史成登州志而濟南缺焉以
爲憾苟得賢有司及士大夫踵而成之是可以爲法
焉舊志四卷刻於嘉靖十二年今更定之凡八卷順
治己亥督學使者宣城施閏章叙

鄒平縣志原序二

覽馬宛斯先生釋史卷一百六十而知鄒平邑志當成於其手宛斯邑之名家也其時又以學使施尙白爲之序乃蒐嘉靖十二年舊本凡四卷更爲八卷噫亦云善矣今纔週甲子其間政治得失丁戶繁簡風俗醇疵科目斷續文藝刪存已大有不同若姑以云待卽再閱六十年而故老無人遺文散失後之視今亦猶守嘉靖舊本云爾是司土者之責吾鄉程君霽江保障茲邑不減太邱毅然已任以爲鄒平建置遠不具論自前明以及我代爲濟南屬土田平衍得沙

鄒平縣志

原序

二

河白條溝泉流之沃潤民稱不貧又有長白黃山諸峯紆紉磅礴人生其地亦頗不佻士敦實行尙氣誼官中朝者皆嶽嶽懷方多所建白余按學青州兩過於此北望鬱葱烟樹迷離曰是漢伏生當祖龍焚書之後年九十餘以腹記口授尙書故墟也過黌堂嶺下冉冉雲光拂我衣帶曰是宋范文正公下帷處也且諫輒焚草者若而人清可飲冰者若而人志堅泉石節矢柏舟者若而人豈非土厚風淳物產靈異與前賢焜耀輝映者乎莫爲之前雖美弗彰莫爲之後雖盛弗傳霽江蓋懼墮前美而輟其後也於是補輯

精嚴而稍稍益其志於八卷之外請序於予予嘉其
克紹前令徐君聖齊又徵邑紳士成劉諸公復校於
馬子瑜諸人瑜則宛斯先生令嗣也可謂踵事增華
於今爲烈已惟子文采殊遠遜尙白而勉爲掇其句
於端康熙丙子督學使者山陽劉謙吉撰

鄒平縣志原序三

國有史邑有志古已志也者非以侈陳景物實以宏
獎人倫誇多闡靡無取也予治嶧山左眺二東之山
水披六郡之成書星分女虛地控海嶽洋洋大國炳
載藝林我

朝自一統志告成輿圖版籍一覽大觀而濟南屬邑之
鄒平志始修於徐君今君重修之補闕拾遺遠蒐
近采條理井然足婉信史予嘗東望長白醴泉舊刹
掩映於烟雲飄忽中其文正公讀書舊蹟乎且弔荒
祠瞻墓木伏生至今存可也鄒邑古文獻地得以傳

鄒平縣志

原序

四

之不朽者程君之力居多雖然誌者志也心之所之
謂之志一道德以同風俗所以定民之志而不在方
輿紀事紀言紀人之末也是不能不厚望於宰茲土
者是爲序康熙丙子山東鹽法道銀城李興祖題

鄒平縣志原序四

古先王肇置封建列爵分土凡載版圖悉歸聲教故
邾莒屬居屏藩滕薛亦備附庸自漢唐分裂郡縣而
星羅碁布雖黑子彈丸輶軒所至並足備太史之採
風所以國有史邑有乘其關係均至重也鄒平爲古
鄒侯國其間星野川嶽方域城池戶口賦役官師人
物以及風土文章忠孝節義傳聞之散軼時事之災
祥莫不賴有淹雅鴻博之士出而詳其記載宏其纂
集以備掌故垂爲一代之書然斯於司牧者實與有
責焉余於戊辰春奉

鄒平縣志

原序

五

命承乏茲土甫下車巡視城垣因陟麗譙眺山川之形
勝觀人民之繁萃卽以疆域井里溝洫畝畝之大畧
詢之吏人而吏人蒙然張口如墮雲霧余爰取舊志
披覽見其支離附會疑信相參齟齬各半蓋此志乃
前令徐君修於己亥歲迄今閱四十年所矣其中官
職有代替人物有興謝時會遞變因革不侔不獨田
隴移畛屋樹易主卽清河許樂涵蕩遷徙均失其故
道刻舟膠柱聳見互舛余於是深爲慨惜欲重加訂
証以資考徵緣簿書鞅掌猝猝無暇曷致曠此志者
八載比歲黍稷時登雀鼠日簡廼請邑之紳士有聞

望者相與參訂而校讐之去疑以存信芟繁以就簡
復按馬宛斯先生舊志遺稿用宏潤色適其令嗣子
握手示一冊爲志補遺時余小阮復至自邦江是亦
能夙擅著作之林者刻意丹青益相考核爰編輯以
類序之分爲八卷於是文獻燦然稱大備焉是集也
二三子修飾討論而余特纂定以集其成非敢自負
爲董狐之筆也然輶軒問俗太史採風持斯編以往
亦不能無小補云康熙乙亥知鄒平縣事天都程素
期撰

鄒平李大令西圃以志藁相質自稱采訪者十有四
年付邑拔貢成啟洸舉人成瓘攷纂拔貢王方珊舉
人王方瑚進士李景嵩輩校勘成書案志圖與古不
合者以今目驗得之說與衆殊者以徧徵古書得之
爲之注爲攷八表五志四首以總紀提其綱以古名
舉大畧證長白山有肅然名以濟潔見經典沿討上
游謂潔已輟流其小清爲古濟瀆大清則潔渠今受
濟水者語爲閼通宋人謂濟瀆湮者不知河流徙移
其水自在潔亦此例也鄒平故地大割附它邑漢鄒

鄒平縣志

原序

七

平之潔今涸地入齊東今求得漢故縣在孫家鎮又
於魏王城求得赫胥氏陵證爲東朝陽城確在齊東
舊屬鄒平尤爲誠篤好古之徵不粉飾故蹟

天子表章師儒允臣工請立伏氏博士邑人士彌識
所矜嚮其山川之槃鬱風俗之忠厚田土賦役兵防
驛遞之成灋與夫先正政蹟鄉先生懿行流風及匹
夫匹婦之志節可傳者誠宜蒐輯論定視已成事有
所興起語云君子愛人小人易使不於斯志重有賴
歟辛酉秋余奉

命典試大令與分校信其不愧儒吏比視學車過鄒

平相見益親人樂道其賢今修志成所屬能知人於
舊志從馬宛斯之意能定取舍所補僅百年事而於
古多訂正又非官重眎其民民安其政固無暇及此
是可爲伏生鄉人喜者也嘉慶八年歲在癸亥夏六
月

文淵閣直閣事內閣學士兼禮部侍郎提督山東學
政西江劉鳳誥撰

鄒平縣志

原序

續修鄒平縣志原序六

志以傳信貴於紀實蓋志與史並重無取乎揚厲侈陳而泛爲摭拾焉

今上道光拾陸年歲在丙申季夏之初余奉

簡命來宰梁鄒下車伊始接見邑孝廉成肅中先生聆其言論丰采心竊欽之旣而攜所纂邑乘副本面請修輯余應曰此當務之急而守土者之責不容辭也因於公餘翻閱全帙見夫疆界星土里社爲一書戶丁田賦鹽法爲一書城池學校官署爲一書而且建置山水古蹟有必記封

鄒平縣志

原序

一

建職官選舉地封有必記至於忠烈孝義儒林文苑良臣以及烈女流寓藝文雜說莫不條分縷晰原原本本殫見洽聞茂矣美矣煥乎鉅觀豈但漢伏生夫子之傳經鼂錯而功在名教宋范文正公之下帷黌堂而學裕賢輔足以輝煌典冊照耀耳目爲億萬載人口膾炙哉志藁出成君手余加芟潤捐廉百餘金以襄其美嗣復商之兩學博暨同城寅好涓吉興工用付剞劂經三月而藏事茲舉也成君克倡厥始兩學博暨同城寅好克贊厥中而余則克成厥終者也

工既膚敏器實精良穀旦告竣僉曰都哉爰珥
筆叙其原委弁諸簡端紀寔也卽以傳信也謂
足備異日輶軒採入

國史焉可也

持授文林郎湖南桂陽直隸州臨武縣庚申科舉人
知鄒平縣事書田羅宗瀛撰

鄒平縣志

原序

續修鄒平縣志序

民國三年五月前縣知事藥君星壑調考去任余奉檄攝篆斯土星壑臨行時諄諄以重修邑乘一事囑余蓋星壑與邑紳徐君化南王君獻五諸君子議定續修尙未開纂也立馬長亭殷殷囑付余何人斯躬建其盛夫一邑兵農錢穀典章經制凡足以驗興廢察治忽備爲掌故可資考鏡者胥惟志書是賴惟去古愈遠變遷愈雜續編亦愈難即起歷代古人相與探討商榷恐亦不易詳盡矧民國肇造千載一時其政教之轉移人文之升降因革捐益率多更異苟非

鄒平縣志

序

槃槃碩儒操觚從事精心纂輯而歛粹然一帙遽告成功不尤戛戛乎其難矣余學殖荒落蒞鄒已五閱月簿書鞅掌日無寧晷愧未能遍訪漢伏生范文正張長白馬宛斯諸勝迹一闢眼界今幸志書已成將付剞劂見夫山川鍾毓人物菁英往復播遷歷歷如繪較舊乘猶爲美備不第徵文考獻足備國史之搜羅且將砥士風礪士俗顯標淑慝於既往隱寓勸戒於將來使守土者手置一編或循跡以議政或因地以制宜留心國計民生整飭綱常倫紀潤色鴻業開拓文明則星壑與纂修諸君子造福於鄒也大矣若

僅目爲淹貫博雅踵事增華豈集賢開館之本心哉
余聊弁數語黃山黛水之間藉留飛鴻爪印并慰星
壑之天涯倦注云爾中華民國三年歲在甲寅九秋
現知鄒平縣事淮南古壽春趙咸慶稷輔氏撰

鄒平縣志

序

續修鄒平縣志序

民國二年春除服官本省之禁余以魯人宰鄒平魯人治魯事關係所至固無敢頽脫者越半載邑議長徐化南先生及紳士諸君子請于余曰鄒平縣志自前邑令羅君宗瀛重修後于今七十有九年矣其間教育興廢實業良窳物產增減幾經變更與夫仁人孝子節婦烈女名流耆彥時有所聞苟漫無準則長此湮沒也亦憾事幸先生蒞茲土及此時籌集的款兼主筆墨可乎余應曰可意爲勸能表善縣尹職當其樞後之人據邑乘而考故事苟無可稽有司之責

鄒平縣志

序

三

況夫武功龕禍亂文德致太平際此時代過渡國基甫定教育製造日事改良孝義節廉微且掃地及此時而不揚厲之表彰之則物質之文明國粹之光華其何以振達而激勸之以培養我國脈耶若然則縣志之續修蓋有夫不可以已者歟而或有詰余者曰國事日亟庶政待興在在需款其宜修舉而急于縣志者何限子必亟此殆好爲守舊思助長世人之名利心而師古人愚民之故智也哉余曰不然名心熾胸生翅利心肆腹生刺人生自赤子時响則笑叱則啼至黃耄易簪屬續名心不死人生自赤子時與則

喜奪則噓至黃耆易簣屬續利心不死聚天下億萬人
之名心利心伏于翅下窘于刺中鬱而不舒湮而不
達卒之名心不死死死於名利心不死死死於利苟黑
坐而省循焉名也利也從虛幻生從顛倒起生生死
死曷其有極古人之治世也治心治心者治名利耳
雖然敦倫立節愛國濟人名心也良心也人方心冷
之我以心熱之講生計謀幸福營商勸工利心也雄
心也人方心熱之我以心冷之總操夫冷熱生死之
名利心橫覽人情俯察時局如蟻蠓春雨螺蠃祝泥
此名利外之名利心也余何嘗超出於名心利心生

鄒平縣志

序

四

死冷熱之外也者特欲納斯人於名利軌道之中非
助長之又安有愚民之纖芥哉夫我國國魂所以不
撓不屈而光耀於人寰者惟此文化禮教道德倫常
昔爲各國先導今爲世界獨步此蓋我先民壅培滋
釀而漬染於匹夫匹婦之心理者也鄒平民俗敦龐
人情習尚饒存古風故禮失在野葆守獨真惜也鎖
閉心勝進取心薄拘泥於名利渾化於名利耳余此
次爲續修縣志之倡籌款已過半數委王趙諸君爲
編輯任徐劉諸君爲調查其用意也在發揚潛德開
鑿風氣其立體也仿笠澤之蒙莊亦不避夫壹鬱非

噎噍無隔搔耳嗟夫死灰不可溺斷虺不可踐凍蠅
無勢玷玉可虞腐蟹無味豆漆有餘世有違者其獲
我心邇者政局一變本省服官轉須迴避余以調省
送考未得觀縣志之修訖其間補救贊助幸賴繼任
趙稷輔先生總集大成余亦可無憾矣茲適編輯告
竣將付梓人邑諸紳函囑余爲之序余故揮藟冗筆
作噎噍言郵而弁之時民國三年秋九月前鄒平縣
知事棲霞藥鍾垚星壑氏撰

鄒平縣志

序